

Weh Wi Ga Fi Seh

Luk owt: Vairós di nak
bowt agen! Tek kayr.

Joon tu Novemba: Yu Redi If Wahn Harikayn Kong Kong Vizit Wi?

Wi don shylla wid unu di nayhn dehn fi di 2022 Atlantik harikayn seezn. Wi mi du dat laas week. Da fahn sins di 1960s dat ih mi ton regyula ting fi staat gi harikayn nayhn. Bifoa datideh taim, wi jos mi kaal dehn bai di yaa, laik di 1931 harikayn weh mi mash op Bileez Siti. Bifoa, harikayn seezn doz en eena Aktoaba, bot soh moch klaimit chaynj di chaynj op tingz, now di Atlantik di geh waama ahn waama. Soh, tudeh day, harikayn seezn da fahn Joon tu en a Novemba! Wi pray seh no harikyan kong kong fling bowt aal wi ting dehn, mash op wi priti Bileez ahn, wosara, dat nobadi kech dehn ded er wayk op ded. Yu redi? Yu ga wahn plan redi shud-in-kays yu need fi moov yusef ahn yu famili?

Weda wi kaal it “harikayn” eena di Atlantik, eena fi wee paat a di werl ... er weda wi kaal it “taifoon” laik how dehn kaal it eena Ayzha ... er weda dehnya big big staam da “saikloan” laik eea Aschraylya, wan ting wi noa: noh play wid harikayn!

KRIOL

ENGLISH

breez di bloa haad	heavy wind
breez	breeze, wind
harikayn	hurricane
flod	flood
machras gaahn een	mattress destroyed
mi ting dehn brok op	my belongings destroyed
mod	mud
rayn	rain
tonda	thunder
waata kohn op	storm surge
weda	weather (especially as in bad weather)
win	wind

Silvaana Udz, Ed.D. da fahn Bileez. If yu waahn tel shee bowt sohnting speshal fu put eena dis Kriol
aatikl, eemayl: sudz142@gmail.com Vizit: www.nationalkriolcouncil.org